

聚學軒叢書

008

Z12

102

聚學軒叢書第四集第十一

有

牢

闌

祔

十

齊

素村陳先生太玄闡祕序

楊子雲作太玄以準易後世覃心于易者無不兼治太玄極深研幾文不虛立稱之者無間言宋衷陸績范望司馬公諸家之注亦十得八九矣邅上素村陳先生復推尋子雲所歷時變原其忠義憤鬱之微旨窮思殫慮輯成一書題曰闡祕先生之言曰吾於漢室孤臣得三人焉史游之急就也焦贛之易林也子雲之太玄也急就諷元帝易林悲世亂太玄刺權姦詞雖不同旨然其苦心忠於王室一也故於急就則探其奇於易林則正其譌於太玄則著其靈先生之於書真可謂好學深思心知其義者矣今夫聖人之爲言也必規時審務權天

下之變以籌一身之所處別治亂之統紀禍福之朕兆
立一時觀萬世視之樊如推之廓如未有悠悠然不當
於身世之故而泛立闊議概舉叢說以自託子垂教後
世者也玉門演易孔子實之以文王與紂之事周公繫
爻于箕子之貞岐山之享明白指示以發其凡孔子作
春秋誅亂賊一本大易扶陽抑陰之義著其旨于文言
曰非一朝一夕之故皆是物也子雲是書發憤而作蓋
亦託于蒙難艱貞之旨焉而豈徒揆日星察時序明歷
紀列善敗爲占筮之資而已哉然則闡祕之成實仰窺
前聖著書之心法不第爲子雲一人言之也至於辨黨
惡之誣綜始終之行以不及其祿不難之義明子雲可

雲可以無死則又執聖人之權持羣論之平可以爲子
雲定讞者也武進後學李兆洛序

三
月

二

史稱揚子雲好學博覽覃深精思家無儋儲晏如也漢成帝時奏賦爲郎迨事哀平值大盜移國漢室邱墟雄以一執戟郎既不克剗刃賊腹以抒忠憤又不獲脫身歸隱高揖松喬於是託草玄以諷刺推皇極之曆運述陰陽之消長俾知大寶不可以妄干天誅之所必殛爰特艱深其辭隱晦其義以避忌諱使人不知其爲刺莽也諸儒不識咸以僭經非之卽同時博洽如劉歆尙有覆瓿之誚宜雄笑而不應也自侯芭受業以來譽玄者固多而毀之者亦復不少總緣未悉知人論世之旨泥於卦爻術數之說以致義愈晦而旨愈隱矣惟宋高似孫日子雲之意其疾莽而作者乎哀平失道莽輒亂常

子雲推天人終始順逆之理正君臣上下進退之分以爲違天拂人賊臣戒其說切中作者意甚矣解人之難遇也夫以玄之精深博大古質簡奧而世人往往苦其難讀卽間有一二高明之士亦一覽而置之何玄之遠人若是哉曩讀司馬文正公集注略識大槩未窺其蘊今春獲讀范望解贊及葉子奇本旨嫌其冗贅不能有所發明爰不揣固陋徵諸史冊準乎洪範參之大易考正其難讀之字折衷於諸家之說庶二千年來未白之幽衷一旦豁然天壤諒亦士君子所樂觀而心許也至其理與易合詞與詩合其議論書法又皆與春秋合後儒未能闡發其祕置於諸子之列良可慨嘆雖然子雲

之文章卓越兩漢載在史冊固無論已然子獨於其出處大略不能不爲之辯焉史稱雄恬於勢利好古樂道與董王同列莽賢爲三公權傾人主所薦莫不拔擢而雄三世不徙官則其平素不奔競於權勢之門可知矣更讀其丹轂赤族之文與夫炎炎者滅隆隆者絕等語皆諷刺當時豈腆顏忍恥作符命之人哉揆其所以不早引退者當莽篡弑之始降封孺子嬰爲定安公邑萬戶地方百里時天下雖稱新焉知異日不能如少康之一成一旅滅浞誅澆而祀夏配天耶是孺子一日未死漢統一日未絕莽固不得稱建國元年也雄以三世舊臣且精於術數知莽不久必敗漢當復興故聊且依隱

玩世將拭目以觀天下之變一俟大逆授首於漸臺耳
事之逆料不可知然觀其校書天祿於國破君亡之日
猶手抱漢代遺書而校錄之足見其心之不忘漢矣當
被收時莽並代白其枉曰雄素不與事讀此則不但符
命事無雄而雄之不居其位不謀其政亦明矣後儒紛
紛責其畏死不去嗟乎士君子當國家革命危難之秋
其進退存亡固有難於表白者昔孔子稱殷有三仁而
微箕不死未嘗不在仁人之目晏子不死齊莊之難夷
吾不恥堂阜之囚古大臣臨危授命其志各有在豈若
匹夫匹婦之爲諒自經於溝瀆者耶况立文語皆刺莽
後儒不能知人論世輒欲苛責其不死使一腔忠憤付

諸覆盆綱目莽大夫之書亦士君子之不幸也夫嘉慶
甲戌仲冬下澣邗江耕心老農素村陳本禮漫識時年
七十有六

例言

一子雲作玄義在刺莽非擬易也其託諸玄何玄天也
天道彰善癉惡其機緘之發八卦甲子神謀鬼藏日
星耀魄水火爭靈好還之報感召甚速當莽擅權造
逆之始子雲手無寸鐵心有神鋒故覃深精思草爲
太玄欲以辟邪佞警權姦而寒篡賊之膽也是時莽
燄正熾故特艱深其辭曲諱其義以避禍也

一太玄以陰陽爲關鍵以五行爲消息以日星爲運度
以晝夜爲吉凶其數始於三而終於九極九九之數
而成八十一首贊辭亦每首九贊共成七百二十九
贊推而衍之則有三方九州二十七部八十一家之

分以盡世運人事之變託象以明理觀物以知化大而君臣父子細而草木蟲魚明則察乎天地幽則極乎鬼神此太玄所以能彰往察來與大易同旨漢儒謂其義合五經良有以也

一太玄以九成數者蓋始於河洛案洪範五行一曰水二曰火三曰木四曰金五曰土太玄起例每首亦各案五行生剋值世任事一六爲水二七爲火三八爲木四九爲金中五爲土五行用事者王所生者相故王廢勝王者囚王所勝死此皆天地一定之理出乎先天者也

一贊辭以初一次二次三爲思次四次五次六爲福次

七次入上九爲禍案洪範五事其一曰思思曰睿睿作聖五福一曰壽二曰富三曰康甯四曰攸好德五曰考終命六極一曰凶短折二曰疾三曰憂四曰貧五曰惡六曰弱太玄八十一首七百二十九贊皆以思福禍三項平列而該之蓋天下人事莫不由於思起而禍福隨之書曰惠迪吉從逆凶孟子曰禍福無不自己求之者天作孽猶可違自作孽不可活此皆太玄託諷之微文也猶恐未盡其變故又創爲旦筮夕筮日中夜中等占蓋欲以當暮鼓晨鐘震醒權奸之癡夢耳

一子雲仕漢歷成哀平三世不徙官與莽賢同立及莽

纂立始以耆老久次轉爲大夫其仕莽也固毋庸爲
子雲諱後儒爲雄訟冤每以年歲不符或以未及仕
莽紛紛代辯案雄家牒公生於成帝甘露元年年七
十一卒蓋是莽天鳳六年己卯非五年戊寅也史冊
並誤故特爲創立年考俾公年歲及公一生出處大
略稍有可考

一 玄文本有玄圖玄告等篇其圖不傳至宋邵子始有
準易圖王薦有日星節候圖元儒胡一桂有方州部
家圖明儒葉子奇有一玄都覆三方圖皆不過紀其
三方次序耳无甚精義今予既采集諸家特另製方
圓一氣圖俾圓者合天方者應地其中五行生剋之